

खबरां

1. प्रधानमंत्री नरेन्द्र मोदी होरें आखेआ ऐ जे सरकार करसानें दे जीवन च सकारात्मक बदलावें लेई वचनबद्ध ऐ ते पीएम धन-धान्य योजना इस सरबंधै च बड़ी महत्वपूर्ण गैह ऐ।
2. इलैक्ट्रानिक्स ते सूचना टेक्नोलाजी मंत्री अश्विनी वैष्णव होरें मुख्यै च 10 लक्ख बसनीकें गी आर्टिफीशियल इंटेलीजेंस दी मुफ्त सिखलाई देने दा ऐलान कीता ऐ।
3. राष्ट्रपति द्रौपदी मुर्मु अज्ज नमीं दिल्ली च बड़ी मती प्रतिश्ठा आहले 2024-25 ब'रे दे स्वच्छ सर्वेक्षण अवार्ड भेंट करडन।
4. केन्द्र सरकारै तेलंगाना ते आंध्र प्रदेश बश्कार पोलावरम बनकाचेरला लिक परियोजना ते बकाया पेदे अंतर-राज्यी जल मुद्दें कन्नै सरबंधत मामलें दी जाँच लेई इक उच्च-स्तरी तकनीकी समिति खडेरने दा फैसला लैता ऐ।
5. भारती समें मताबक रातीं 2 बज्जियै 7एं मिंटें पर अमरीका दे अलास्का इलाके च 7 इशारिया 3 दी तीव्रता आहले भूचाल दे झटके मैसूस कीते गे।
6. महिलाएं दे क्रिकेट च, भारती टीमै जंदी रातीं साउथ-हैंप्टन च खेड्डे गेदे पैहले इक दिवसी मुकाबले च मेजबान इंग्लैंड गी 4 विकटें कन्नै हराई दित्ता ऐ।

<><><><><><>

PM

प्रधानमंत्री नरेन्द्र मोदी होरें आखेआ ऐ जे उंदी सरकार करसानें दे जीवन च महत्वपूर्ण बदलाह आहन्ने लेई वचनें बज्जी दी ऐ। इक सोशल मीडिया पोस्ट च मोदी होरें आखेआ जे प्रधानमंत्री धन-धान्य कृषि योजना गी केन्द्रीय मंत्रिमंडल शा मंजूरी मिलना इस भेठा इक महत्वपूर्ण गैह ऐ। उनें आखेआ जे एहदेकन्नै नां छड़ा राई-बाई दे क्षेत्र च पिछड़े जिलें च फसल उत्पादन बधोग सगुआं करसालें दी औंदन बी बधोग। केन्द्रीय मंत्रिमंडल नै 2025-26 शा शुरू होइयै 100 जिलें गी कवर करने लेई 6 ब'रें दे समें लेई प्रधानमंत्री धन-धान्य कृषि सोजना गी मंजूरी दित्ती ऐ। इस योजना दा उद्देश्य मती शा मती बक्ख-बक्ख किस्में दी फसलें दी पैदावार बधाना ते राई-बाई सरबंधी टिकाऊ ते सशक्त तौर तरीके गी अपनाना, सिंचाई सुविधाएं च सुधार करना ते होर दुए लोडचदे गैह शामिल न।

<><><><><><>

Ashwini-CSC Diwas

इलैक्ट्रानिक्स ते सूचना प्रौद्योगिकी मंत्री अश्विनी वैष्णव होरें घोषणा कीती ऐ जे देश च 10 लक्ख नागरिकें गी मुफ्त आर्टिफिशल इंटेलीजेंस दी सिखलाई प्रदान कीती जाग। इस भेठा ग्रामीण स्तर दे एघमिणें गी प्राथमिकता दित्ती जाग। वैष्णव होरें एह घोषणा डिजीटल भारत दे 10 ब'रे पूरे होने गी दिखदे होई नमीं दिल्ली च आयोजत कॉमन सर्विस सेंटर-सीएससी कार्यकत्तए दे जतनें ते उपलब्धिएं उप्पर लोह पांदे होई श्री वैष्णव होरें आखेआ जे पूरे मुख्य दे ग्रामीण स्तरे दे उद्यमिणें डिजीटल भारत दा लाह हर इक नागरिक तगर पजाइयै इक शानदार मसाल पेश कीती ऐ।

<><><><><><>

President

राष्ट्रपति द्रौपदी मुर्मु होर अज्ज नमी दिल्ली च बड़ी मती प्रक्रिया आले स्वच्छ सर्वेक्षण 2024-25 पुरस्कार प्रदान करगन। एह कार्यक्रम शैहरी भारत दे सब्बने शा स्वच्छ शैहरें गी सम्मानत करोग ते स्वच्छ भारत मिशन शैहरी एसबीएमयू गी अगगे बधाने व शैहर दे सशक्त जतनें गी मान्यता बी देग। इस ब'रे पुरस्कार चक्रं श्रेणिएं च प्रदान कीते जांगन। जिंदे च सुपर स्वच्छ लोक शैहर ते 5 जनसंख्या श्रेणी च शीर्ष 3 स्वच्छ शैहर शामिल न। घर, मकान ते शैहरी मामले दे मंत्रालय नै आखेआ ऐ जे इस ब'रे कल 70 ईनाम

प्रदान कीते जांगन। स्वच्छ भारत मिशन शैहरी तैहत्त स्वच्छ सर्वेक्षण दी एतिहासक पैहल, शैहरी भारत दी स्वच्छता आली बक्खी इक निर्णायक शक्ति बनी गई ऐ।

<><><><><><>

Amit Shah

केन्द्री गृह ते सहकारी मंत्री अमित शाह होर अज्ज जयपुर च डाडिया ग्रां च आयोजत सहकारिता ते रोजगार उत्सव च शामिल होंगन। शाह होर इक बड्डी जनसंभा गी बी संबोधत करगंन। इस मौके ओह सरकारी नौकरिएं लेई नमें नियुक्त नोजवानें गी नियुक्ति पत्र बी सौंपगन। शाह होर बक्ख-बक्ख स्कीमें शा लाह चुक्कारदे लाहकारिएं गी सर्टिफिकेट ते चैक बंडगंन ते सहकारिता सरबंधी बक्ख-बक्ख ढांचागत परियोजनाएं दा उद्घाटन बी करगंन। केन्द्री मंत्री होर विश्व दी सब्बने शा बड्डी अनाज भंडारण योजना तैहत्त बनने आले 24 वेयरहाउसिस ते श्री अन्ना दे प्रचार लेई 64 मिलेट दकानें दा बी उद्घाटन करगंन।

<><><><><><>

Jal Shakti Telangana/AP

सरकारै तेलंगाना ते आंध्र प्रदेश बश्कार पोलावरम बनकाचेरला लिक परियोजना ते बकाया पेदे अंतर-राज्यी जल मुद्दे कन्नै सरबंधत मामलें दी जाँच लेई इक उच्च-स्तरी तकनीकी समिति खडेरने दा फैसला लैता ऐ। केन्द्री जल शक्ति मंत्री सी.आर. पाटिल हुं'दी अध्यक्षता च कल नमीं दिल्ली च आंध्र प्रदेश दे मुख्मन्त्री एन. चंद्रबाबू नायडू ते तेलंगाना दे मुख्मन्त्री ए. रेवंत रेड्डी हुं'दे कन्नै इक उच्च-स्तरी बैठक दे बाद एह फैसला लैता गोआ। जल शक्ति मंत्रालय नै आखेआ जे दौनें राज्यें ते केन्द्र दे वरिष्ठ अधिकारियें ते तकनीकी माहिरें दी एह समिति बकाया पेदे मुद्दे दा मिलियै आंकलन करोग ते बरोबर ते असरदार ढंगै कन्नै पानी दी बंडुड जकीनी बनाने लेई न्याऽसंगत ते तकनीकी रूप कन्नै मुमकन हल दी सफारिश करोग। बैठक च पानी दे प्रबंधन कन्नै जुड़े दे प्रमुख्मुद्दे पर विचार-बटांदरा कीता गोआ। बैठक च दौनें राज्यें कृष्णा बेसिन च पानी दे प्रवाह दी असल समें निगरानी लेई टेलीमेट्री उपकरणों दी स्थापना पर बी सैहमति व्यक्त कीती। उ'नें इस गल्लै पर बी सैहमति जताई जे श्रीसैलम बन्न दी सुरक्षा ते रक्ख-रखाऽ सरबंधी मुद्दे दे हल लेई फौरी उपाऽ कीते जाडन। दौनें राज्य इस गल्लै पर बी सैहमत हे जे कृष्णा नदी प्रबंधन बोर्ड दा दफतर विजयवाड़ा थमां अमरावती मुंतकिल कीता जाह्ग।

<><><><><><>

UIDAI

भारतीय विशिष्ट पंछान सरबंधी प्राधिकरण यूआईडीएआई ने मरे दे लोकें दे आधार नंबरें गी बंद करियै आधार डेटाबेस गी सटीक ते बसाह् भरसे आला बनाइयै रखने लेई सकारात्मक गैह् पुट्टन। एहदे लेई यूआईडीएआई नै आधार कार्ड बंद करने दे सरबंध च 1 करोड़ 5 लक्ख मरे दे लोकें दा पता लाने लेई भारत दे रजिस्ट्रार जनरल दे कन्नै सैहयोग कीता ऐ। इलैक्ट्रानिक्स ते सूचना प्रौद्योगिकी मंत्रालय नै इक ब्यान च आखेआ ऐ जे भारत दे रजिस्ट्रार जनरल नै नागरिक पंजीकरण प्रणाली सीआरएस दा इस्तेमाल करियै 24 राज्यें ते केन्द्र शासत प्रदेशों दे तकरीबन 1 करोड़ 17 लक्ख आधार नंबर बंद करी दित्ते न। ब्यान च आखेआ गोआ ऐ जे गैर-सीआरएस राज्यें ते केन्द्र शासत प्रदेशों च बी इयै जनेई प्रक्रिया चला'रदी ऐ। अजें तगर 6 लक्ख 70 जहार मरने सरबंधी रिकार्ड हासल होई चुके दे न ते उंदे आधार नंबर बंद करने दा कम्म चला'रदा ऐ। यूआईडीएआई नै पिछले म्हीने माइ आधार पोर्टल उप्पर इक नमीं सेवा परोआर दे मरी गोदे सदस्यें दी सूचना बी शुरू कीती जेहदे राएं लोक अपने परोआर दे सदस्यें दी मौत दी खबर देई सकदे न।

<><><><><><>

Alaska Earthquake

भारती समें मताबक रातीं 2 बज्जियै 7एं मिंटें पर अमरीका दे अलास्का इलाके च 7 इशारिया 3 दी तीव्रता आहले भूंचाल दे झटके मैहसूस कीते गे। अलास्का च भूंचाल दी निगरानी सरबंधी एजेंसी नै आखेआ ऐ जे इस भूंचाल दा केन्द्र अलास्का च सैंड प्वाईट दे दक्खन च 89 किलोमीटर दे छिंडे पर हा। एजेंसी नै इब्बी आखेआ ऐ जे भूंचाल दे झटके बड़े बड़्ठे इलाके च मैहसूस कीते गे। उआं किश इलाकें च एहदी तीव्रता घट्ट ही। अजें तोहड़ी इस भूंचाल करी जान माल दे नुकसान दी कोई खबर नेई ऐ। अलास्का च भूंचाल सरबंधी केन्द्र – ए.ई.सी. दे डरैक्टर माईकल वैस्ट होरें आखेआ ऐ जे समें दे कन्नो-कन्नी भूंचाल दे झटके बी हौले हुं'दे गे ते एहदे परैन्त सूनामी दी कोई चेतावनी नेई ऐ।

<><><><><><>

Trump

अमरीकी राष्ट्रपति डोनाल्ड ट्रंप होरें आखेआ ऐ जे भारत ते अमरीका बश्कार बहु-प्रतिक्षित अंतरिम बपार समझौते उप्पर चला'रदी गल्लबात तोले गै पूरी होई सकदी ऐ। ट्रंप होरें आखेआ जे वार्ता सेई दिशा च अगगे बधा'रदी ऐ ते प्रस्तावित समझौता अमरीकी कंपनिएं गी अमरीका ते इंडोनेशिया बश्कार होए दे बपार समझौते आला लेखा भारतीय बजार च बेहतर पुज्ज प्रदान करोग। उनें आखेआ जे अमरीका गी इंडोनेशिया च पूरी पुज्ज हासल ऐ ते भारत बी इस्सै भेठा कम्म करा'रदा ऐ।

<><><><><><>

IMD

भारती मौसम विभाग नै अगले दो दिने च केरल, माहे ते दक्खन कर्नाटक च भारी थमां बड़ी भारी बरखा दी शैंका बुज्झी ऐ। उत्तर प्रदेश ते उत्तराखंड च बी भारी बरखा पौने दी मेद ऐ। मौसम विभाग नै आंध्रप्रदेश, केरल, माहे ते लक्षद्वीप दी बक्ख-बक्ख थाहरें तेत हवा चलने दी मेद दस्सी ऐ।

<><><><><><>

Women Cricket

महिला क्रिकेट च भारत नै कल रातीं साउथ एमपटन दे द रोस बॉल च खेड्डें गेदे पैहले इक दिवसीय मैच च मेजबान इंग्लैंड गी 4 विकटें कन्नै हराई दित्ता। इस जित्त कन्नै भारतीय टीम 3 मैचें दी श्रृंखला च 1-0 कन्ने अगगे चला'रदी ऐ। पैहले बल्लेबाजी करदे होई इंग्लैंड नै 50 ओवरें च 6 विकटें दे नुकसान पर 258 रंज बनाए। लक्ष्य दा पिच्छा करदे होई हरमनप्रीत कोर दी अगुवाई च भारती टरम नै 10 गेंद शेष रौहदे होई गै मैच अपने नां करी लेआ। दीप्ती शर्मा नै नाबाद 62 रंज बनाए ते उनेंगी प्लेयर ऑफ द मैच चुनेआ गेआ। भारत दा हुन दूआ मैच लंदन दे लार्डस च औंदे शनिवार होग।

<><><><><><>